

REPUBLIKA E KOSOVËS
KUVENDI I KOMUNËS NË MALISHEVË

Kuvendi Komunal – Malishevë

PROCESVERBAL

i mbledhjes së II (dytë) të jashtëzakonshme të Kuvendit Komunal të Malishevës.

Mbledhja u mbajt, më datë: 20.01.2026, duke filluar nga ora: 10:15.

Mbledhjen e kryesoi Kryesuesi i Kuvendit Komunal në Malishevë, Fatmir Ademaj. Të pranishëm në këtë mbledhje ishin: 24 anëtarë të Kuvendit Komunal, Kryetari i Komunës, përfaqësues të OSBE-së, medie dhe përfaqësues nga Zyra për Informim.

Rendi i ditës

1. Dhënia e betimit të anëtarit të Kuvendit Komunal, z.Albrim Morina.
2. Shqyrtimi dhe miratimi i kërkesës nr.04/534 dt: 29.08.2025 për miratimin e projektbuxhetit për vitin 2026/2028.

Kryesues i Kuvendit, **Fatmir Ademaj**, Përshëndetje për të gjithë!

Mirë se keni ardhur në mbledhjen e dytë II të jashtëzakonshme, së pari kërkoj nga sekretaria e kuvendit të verifikojë numrin e anëtarëve të Kuvendit se a kemi kuorum për vazhdim të kësaj seance. Konstatojmë që të pranishëm jemi 24 anëtarë, ndaj kemi kuorum për vazhdim të kësaj seance. Kemi dy pika të rendit të ditës të cilat janë:

1. Dhënia e betimit të anëtarit të Kuvendit Komunal, z.Albrim Morina.
2. Shqyrtimi dhe miratimi i kërkesës nr. 04/534 datë: 29.08.2025 për miratimin e projektbuxhetit për vitin 2026/2028.

Veton Zogaj (anwtar nga LVV): Nëse kisha mundur një propozim për një pikë shtesë?

Fatmir Ademaj, Kryesues i Kuvendit: Veton nuk di e ke lexuar ligjin në mbledhjet, e jashtëzakonshme nuk ka ndryshim të rendit të ditës.

Veton Zogaj (anwtar nga LVV): Kryesues është shumë me urgjencë, nëse kishe mujtë me shti si pikë të rendit të ditës ose mos me çuar shumë gjatë formimi i komisionit për hartimin e Planit të Punës së Kuvendit për vitin 2026. Jemi në fund të muajit janar vazhdojmë të mbajmë seanca të jashtëzakonshme, urgjente, dhe nuk e kemi një Plan të Punës për vitin 2026.

Fatmir Ademaj, Kryesues i Kuvendit: Ne kemi mbajtur mbledhje në KPF dhe gjatë diskutimit ju kam pyetur, a ka dikush propozim për mbledhje për ndonjë pikë të veçantë, të cilën e vlerësojnë anëtarët e KPF-së, që të futet si pikë në rend të ditës në seancën e jashtëzakonshme? Veton, ti ke qenë pjesë e komitetit dhe nuk ke pasur një propozim të tillë, në aspektin ligjor mos të kërkojmë diçka që ta shkelim ligjin, përderisa mbledhja e rregullt e asamblesë Komunale do të mbahet shumë shpejt me një agjendë të veçantë për vitin kalendarik 2026 të Planit të Punës së Kuvendit Komunal.

Jemi në proces të votimit, kush është për këtë rend të ditës?

Për: 21

Kundër: 0

Abstenim: 3

Me 21 vota Për, 0 Kundër, 3 Abstenime miratohet ky rend i ditës.

Vazhdojmë me pikën e parë të rendit të ditës e cila është: Dhënia e betimit të anëtarit të Kuvendit Komunal, z.*Albrim Morina*. Duke dhënë dorëheqje anëtari nga PDK është zëvendësuar dhe kemi Vendimin e KQZ-së për ndryshimin e anëtarëve në Kuvendin Komunal. *Albrim Morina*

emërohet anëtar i Kuvendit në Malishevë nga subjekti politik PDK, duke zëvendësuar anëtarin e Kuvendit Komunal, *Mevludin Mazreku*. Unë po lexoj në fund do ta bëni betimin. *"Unë Albrim Morina, betohem se do t'i kryej detyrat me nder, besnikëri, paanime e me ndërgjegje dhe sipas ligjit do t'i ushtroj autorizimet e mia si anëtarë i Kuvendit të Komunës së Malishevës, në mënyrë që të sigurohen kushtet për jetë të qetë për të gjithë. Betohem!"*

Fatmir Ademaj, Kryesues i Kuvendit, urime Albrim!

Vazhdojmë me pikën e dytë të rendit të ditës: Shqyrtimi dhe miratimi i kërkesës nr. 04/534 datë: 29.08.2025 për miratimin e projektbuxhetit për vitin 2026/2028.

Fillimisht ftoj Kryetarin që ta marrë fjalën. Urdhëro z. Kryetar!

Ekrem Kastrati, Kryetar i Komunës:

I nderuari Kryesues,

Të nderuar këshilltarë komunal,

Të gjithë ju të pranishëm, qytetarë që po na ndiqni përmes kanaleve tona të komunikimit.

Ju falënderoj të gjithëve që përmes pjesëmarrjes suaj në këtë mbledhje të Kuvendit, i jeni përgjigjur pozitivisht ftesës së Kryesuesit të Kuvendit, për të shqyrtuar kërkesën time, të cilën e kam parashtruar konform kompetencave ligjore të Kryetarit të Komunës, që ka të bëjë me miratimin e projektbuxhetit të Komunës së Malishevës për vitet 2026/2028, me theks të veçantë për vitin 2026.

Të nderuar këshilltarë komunal, të dashur qytetarë, mbledhja e sotme është e një rëndësie të veçantë për Komunën tonë dhe interesin e përgjithshëm të qytetarëve tanë, për të thënë më mirë është më e rëndësishmja që legjislatura e institucionit tonë mban gjatë një viti kalendarik, për faktin se këtu vendoset për investimet e qeverisjes komunale për vitin aktual dhe në vijim.

Të nderuar të pranishëm, siç edhe jeni në dijeni përmes materialeve që keni pranuar për mbledhjen e sotme, për hir të opinionit publik, po e ritheksoj se Komuna e Malishevës për vitin 2026 ka një buxhet në vlerë prej **22,088,710.00 €**, që krahasuar me vitin e kaluar, kemi një buxhet mbi 500,000 euro më të lartë. Mirëpo, kjo rritje ndërlihet direkt në kategorinë paga dhe shtesa.

Rritja e vogël është si pasojë e pakësimit të numrit të banorëve në Komunën e Malishevës. Pra, dua ta theksoj për ju dhe të gjithë qytetarët tanë se ky buxhet është jo populist, por është buxhet që në fokus ka zhvillimin ekonomik, vazhdimin e investimeve në qendër dhe fshatra, gjithnjë në funksion të jetësimit të projektit tonë të përbashkët për Malishevën Urbane dhe fshatra të urbanizuara, për të cilin na kanë dhënë besimin edhe qytetarët e komunës sonë, në zgjedhjet e fundit elektorale.

Konkretisht në buxhet për vitin 2026 nga granti qeveritar janë **20,144,762.00 €** dhe nga të hyrat vetjake **1,943,948.00 €**, me rritje të të hyrave vetanake prej **438,422** euro, të shpërndarë në 5 kategori ekonomike, në kategorinë:

1. *Paga dhe Shtesa* janë të planifikuara **13,077,454.00 €** (për 1,378 të punësuar);

2. *Mallra dhe Shërbime* janë planifikuar 2,555,812.00 €;
3. *Shpenzimeve Komunale* janë 500,000.00 €;
4. *Subvencioneve* kemi planifikuar 600,000.00 €, dhe kategoria më e rëndësishme për zhvillimin e komunës sonë është kategoria:
5. *Investimeve kapitale*, ku janë planifikuar saktësisht 5,355,444.00 €, që krahasuar me vitin aktual kemi rreth 708 mijë euro më pak, për shkak të numrit të banorëve, por ne planifikojmë ta mbulojmë përmes realizimit të tejkallimit të të hyrave të vitit 2025, e cila në total kap vlerën mbi 1 milion euro.

Siç e dimë pjesa më e madhe e buxhetit të Komunës është ndarë në 3 programe kryesore, në:

Programin për arsim;

Programin për shëndetësi, si dhe

Programi për administratë Komunale.

Të nderuar ky projektbuxhet është me modifikime shumë të vogla. Jam plotësisht i vetëdijshëm se një pjesë e madhe e mjeteve për investime kapitale janë të parapara për infrastrukturën rrugore nëpër të gjitha fshatrat e Komunës së Malishevës dhe në qendër të qytetit: kanalizime, ndriçimit publik etj. Po ashtu dua ta theksoj se me investimet në qendër tashmë jemi në fazën e përfundimeve, për vitin aktual dhe vijues janë hapur shumë rrugë për t'u zgjeruar dhe investime në fshatra, pra për të qenë i sigurtë me vulnetin më të madh secilin fshat e lagje të Komunës sonë planifikojmë ta përkrahim me investime sipas nevojës.

Unë shpreh gjithë gatishmërinë time që si Kryetar i Komunës së Malishevës, pavarësisht kësaj, do të jem shumë i gatshëm që kërkesat tuaja për projekte me interes për qytetarët tanë, apo për zgjidhjen e problemeve nëpër fshatra tona apo këtu në qytet, që nuk kanë gjetur hapësirën në këtë projektbuxhet, ju siguroj se do të bëjmë maksimumin për t'i përkrahur në të ardhmen e afërt. Mirëpo, gjithsesi mendoj që ky projekt prek nevojat më elementare që kanë qytetarët tanë, dhe ne do të bëjmë të pamundurën që të investojmë dhe banorëve tanë tua përmisojmë kushtet bazë për një jetë më të mirë e më të dinjitetshme. Jam plotësisht i vetëdijshëm se anekënd komunës sonë ka nevojë për më shumë investime kapitale; për më shumë përkrahje, thuajse në secilën fushë zhvillimore, por mundësitë tona buxhetore janë paksa të kufizuara, veçmas tash kur kemi një buxhet më të vogël që ka rrjedh si pasojë e zvogëlimit të numrit të banorëve, ku zyrtarisht është 43 mijë e 888 banorë.

Ju siguroj se për asnjë moment nuk do të ndalem që për shumë projekte me interes për komunën dhe qytetarët tanë, të cilat ne si komunë nuk kemi mundësi buxhetore për t'i jetësuar, do të drejtohem për të gjetur përkrahje institucioneve qendrore, duke mos lënë anash edhe donatorët dhe partnerët tanë ndërkombëtarë. Prandaj, duke pasur në konsideratë se miratimi i buxhetit është edhe obligim yni ligjor, kërkoj nga ju që pas kontributeve që mund të jepni në këtë seancë, në fund ta përkrahni miratimin e këtij projektbuxhetit të Komunës së Malishevës për vitin 2026/2028 me theks të veçantë për vitin 2026. Më lejoni të theksoj se që nga viti 2022 ku ne kemi nisur të punojmë si qeverisje komunale e dalë nga zgjedhjet e fundit lokale, kemi një rritje të buxhetit në vlerë prej 6,2 milion euro.

Fatmir Ademaj, Kryesues i Kuvendit: Faleminderit Kryetar, urdhëro Drejtorin për Buxhet dhe Financa, *Blerim Thaçi*!

Blerim Thaçi, Drejtor për Bugjet dhe Financa:

Më lejoni t'ju urojë për zgjedhjen tuaj këshilltarë komunal dhe njëkohësisht dhe juve si Kryesues i Kuvendit, duke ju uruar suksese dhe bashkëpunim për 4 vitet e ardhshme. Kryetari e prezantoi projektbuxhetin për vitin 2026/2028 me theks të veçantë për vitin 2026, i cili buxhet ka vlerën 22,088,710.00 €. Është pothuajse një buxhet i njëjtë me vitin 2025 me ndryshime të vogla, me një rritje shumë të vogël dhe ato rritje shkojnë në kategorinë e *Pagave dhe shitesave*, duke futur dhe rritjen e limitit të të hyrave vetanake pasi që në 4 vitet e fundit kemi pasur tejkalim të të hyrave. Kjo ka ndodhë pasi numri i popullsisë në Komunën tonë është zvogëluar. Kategorinë që ka ndikuar më së shumti është në *kategorinë e investimeve kapitale*, kjo na sfidon në realizimin e projekteve, në kërkesat e tjera të qytetarëve, mirëpo duke pasur parasysh që në vitin 2025 kemi pasur tejkalim të të hyrave mbi 1 milion euro nga kjo të shohim se si do t'i mbulojmë pjesët e tjera obligimet kontraktuale, të kërkesave të tjera të qytetarëve.

Ky buxhet është dorëzuar në Kuvendin Komunal në fund të muajit gusht sipas obligimeve ligjore dhe para jush është prezantuar si i tillë, mirëpo për shkaqe të ndryshme nuk ka mundur të aprovohet si buxhet. Tani jemi para jush me kërkesë që të miratohet ky buxhet me dy ndryshime, një ndryshim tjetër është teknik si kërkesë që e kemi pasur në KPF. Ndryshimet janë kryesisht të *investimet kapitale* njëra prej tyre që është e domosdoshme sanimi i kësaj sale qoftë ajo elemntare qoftë teknike. Është një kod i ri që do të futet dhe *vërshimet e fundit* që kanë ndodhur në Malishevë janë dëmtuar disa ura njëra në Malishevë dhe njëra në Carrallukë. Është dashur të planifikojmë investimet në këto dy ura dhe kam propozu që të hyjnë në projektbuxhet që presim të miratohet nga ju. Çështja tjetër gabimi teknik në buxhetin e prezantuar në gusht të vitit 2025 për arsye që Ministria e Financave nuk lejon të futen të gjitha shënimet që i japim në buxhet, sidomos të rrugët është një hapësirë e madhe, para jush e kemi sjellë të përmisuar, sepse janë të gjitha rrugët në fshatra dhe kryesisht është interesi i gjithë qytetarëve. Këto rrugë i ka projektu operatori projektues i cili është i kontraktuar nga Komuna dhe janë në detaje afro 50 km që do të shtrohen për tri vjet dhe janë të specifikuar me akse.

Ju mund të thoni kush është aksi 1 aksi 2 të gjitha këto specifikisht mund t'i gjeni në Drejtorinë e Urbanizmit, që janë të specifikuara saktë cilat rrugë do të shtrohen dhe cilat do të mirëmbahen. Rrugë të reja është vlera rreth 7,000,000 euro, mirëmbajtja e rrugëve në fshatra edhe aty kemi përafërsisht 1,000,000 euro. Gjithashtu kemi kanalizime të reja afër 1.4 milion euro, kemi dhe projektin e ndriçimit publik në të gjitha fshatrat. Kryesisht në këtë projektbuxhet është orientu investimi në fshatrat e Komunës së Malishevës. Nuk përjashtohen dhe investimet brenda qytetit të Malishevës, dhe rrugët rreth lumit që i kemi në Malishevë dhe sanimet të cilat i kemi në qendër të Malishevës. Para jush e kemi projektbuxhetin mund të bëni pyetje dhe do t'ju përgjigjem çfarëdo që keni nevojë.

Fatmir Ademaj, Kryesues i Kuvendit: Para se të hap debatin nga sot do të fillojmë praktikën që fillimisht të paraqiten në emër të Grupeve Parlamentare qëndrimet e tyre, pastaj të hapen debate nga asambleistët komunal. Për arsye të nurmit të asambleistëve e ftoj përfaqësuesin e grupit Nisma të japë qëndrimin e tyre!

Halil Morina, nga Nisma Socialdemokrate:

Faleminderit Kryesues i Kuvendit! I nderuar Kryetar i Komunës, drejtorë të nderuar, kolegë asambleistë dhe ju gjithë të pranishëm! Neve sot na është dhënë mundësia me diskutu për projektbuxhetin për vitin 2026-2028 me theks të veçantë për vitin 2026. Që ka qenë detyrë e legjislaturës së kaluar mirëpo edhe legjislaturës së kaluar i ka ndodhë e njëjta gjë që është dashur të merret me buxhetin e legjislaturës paraprake, kështu që këto gjëra janë normale. Sa herë që ne diskutojmë për buxhetin më kujtohet se sa të mëdha janë nevojat tona të qytetarëve të Komunës së Malishevës në krahasim me mundësitë tona financiare. Mundësitë tona financiare janë shumë të vogla, mirëpo ne funksionojmë në bazë të këtyre mundësive financiare që i kemi. Ajo çka është e rëndësishme të theksohet këtu që këto mundësi financiare që i kemi në këtë projektbuxhet janë të shpërndara në të gjitha kategoritë që prekin nevojat më bazike dhe elementare të qytetarëve të Komunës së Malishevës, sidomos kur flasim për investime kapitale.

Aty janë të përfshira projekte të tilla si asfaltime të rrugëve, kanalizime, ndriçime, projekte të ujësjellësit pothuajse në të gjitha fshatrat dhe vendbanimet e Komunës së Malishevës. Kjo është një dëshmi që ky projektbuxhet është i shpërndarë në mënyrë proporcionale në të gjitha komunitetet e Komunës dhe për të gjithë qytetarët e Komunës sonë. Kjo është e mjaftueshme me dhënë dritën e gjelbërt dhe me dhënë votë *pro* këtij projektbuxheti. Siç e dimë projektbuxhetet janë projeksione mbi të hyrat dhe shpenzimet për vitin e ardhshëm, gjatë këtij viti ne kemi me pasë shumë ndryshime: kemi me pasë të hyra vetanake, kështu që këto mundësi financiare që janë të paraqitura në buxhet kanë m'u rritë më shumë, dhe kemi me pasë mundësinë me realizu projekte të tjera. Në emër të grupit të Nisma-s deklaroj që grupi ynë voton *Pro* për këtë dokument ashtu siç ka ardhë pa asnjë ndryshim.

Fatmir Ademaj, Kryesues i Kuvendit: Në emër të PDK-së urdhëro, *Burim Paçarizi!*

Burim Paçarizi, nga PDK, Përsëendetje për të gjithë!

Së pari para se të futem te buxheti dua të shpreh keqardhje për të gjithë ata që kanë pësuar dëme nga vërshimet, të cilat ndodhën në Komunën tonë. Po ashtu dua të shpreh keqardhje dhe për projektin kryesor të proklamuar dhe organizuar nga partia në pushtet, ku vërshimet kanë ndodhur ende pa u prerë shiriti, pa u funksionalizuar në mënyrën e duhur. Dua ta shpreh një reagim te Amrushë ku e pati në postimin, në profesionin tim. Amrush matjet bëhen dhe realizohen sipas matjeve edhe projektet. Bëhen me matje të realizume prej kompanive serioze po ashtu realizohet projekti, nuk është e natyrshme që një projekt ende pa u funksionalizuar tërrishtë ta marrë uji. Prandaj ne si PDK shprehim keqardhje! Shpresoj që këto vërejtje në të ardhmen dhe sa më shpejt të bëhet sanimi i këtyre problemeve të këtij projekti, sepse veturat e njerëzve të cilët i parkojnë aty që ne i kemi ofruar mundësi, me punën tonë të kenë vërshime, andaj duhet të kemi kujdes dhe të analizojmë këto situata urgjente.

Flasim për përmbajtjen e këtij projektbuxheti duhet të theksojmë një fakt shumë domethënës se ky projektbuxhet është produkt i mandatit të kaluar, ku është dashur të miratohet nga përbërja e mëparshme e Kuvendit Komunal, por ka dështuar sepse nuk ka pasur mbështetje as atëherë as tani. I njëjti dokument pothuajse me të njëjtat probleme na sillen sërish për miratim pa reflektim dhe pa përgjegjësi politike. Ky fakt tregon qartë se problemi nuk është opozita, por paaftësia e qeverisjes komunale për të ndërtuar një konsensus, për të hartuar një buxhet të përbashkët bashkërisht për interesin e qytetarëve.

Ky projektbuxhet nuk është dokument zhvillimor, por është dëshmi e keqmenaxhimit të mungesës së verzionit dhe shkëputjes totale të pushtetit nga realiteti i qytetarëve të Malishevës. Ai nuk synon zhvillim të qëndrueshëm, por mbijetesë politike dhe propaganda mediatike. Ky projektbuxhet nuk ka prioritete reale, nuk i adreson problemet elementare të qytetarëve, rrugët lokale janë në gjendje të mjerueshme, kanalizimet mungojnë, shkollat kanë nevojë për investime serioze, ndërsa shëndetësia po injorohet. Në vend të kësaj fondet po orientohen drejt projekteve të paqarta, të fryera me kosto dhe pa ndikim real.

Së dyti shpërndarja e mjeteve është thellësisht e padrejtë dhe politike disa fshatra trajtohen si prioritet, ndërsa disa të tjera ndëshkohen për arsye partiake, kjo qasje përçarëse e shndërron buxhetin në mjet favorizimi dhe ndëshkimi.

Së treti projektet kapitale janë në vazhdimësi dështime të viteve të kaluara, të njëjtat projekte riciklohen vit pas viti pa u përfunduar, pa llogaridhënie dhe pa përgjegjësi politike.

Së katërti konsultimi me qytetarët ka qenë farës, dëgjimet publike janë mbajtur vetëm për t'i plotësuar kërkesat formale ligjore dhe zëri i qytetarëve është injoruar tërësisht.

Së pesti realizimi i buxhetit në vitet e kaluara ka qenë zhgënjyes, fondet as nuk janë shpenzuar ose janë shpenzuar keq pa ndikim real në jetën e qytetarëve, të gjitha ato nuk kanë dhënë llogari për këtë situatë, së fundi mungon transparenca e Kuvendit Komunal trajtohet si organ formal, ndërsa qytetarët mbahen jashtë informacionit për mënyrën se si shpenzohet paraja publike, si përfundim i këtij projektbuxheti i cili ka dështuar dy herë: njëherë në mandatin e kaluar besoj duhet të dështoj edhe sot, për arsye se edhe ne si PDK besoj edhe kolegët me votu këtë projektbuxhet është jolegjitim dhe është keqmenaxhim, pa drejtësinë dhe mungesën e përgjegjësisë politike. Për këtë arsye ky projektbuxhet duhet të refuzohet pa hezitim dhe duhet të kthehet për shikim, ne jemi për zhvillim të Malishevës, po jo me buxhet të dëshpëruar dhe me qeverisje të papërgjegjshme duke mos marrë asnjëherë kërkesat tona si anëtarë të Kuvendit Komunal që të bëjmë një projekt bashkërisht që ta japim më të mirën e qytetarëve të Malishevës, prandaj ne si grup i partisë së PDK e kundërshtojmë këtë projektbuxhet dhe do të votojmë **kundër**. Falënderit!

Fatmir Ademaj, Kryesues i Kuvendit: Urdhëro, *Fitim Shala!*

Fitim Shala, nga LDK:

I nderuar Kryesues i Kuvendit Komunal, i nderuar Kryetar, të dashur anëtarë të Kuvendit Komunal, meqenëse po shfrytëzoj për herë të parë këtë foltore edhe është mandati im i parë, uroj që koha të na ec mbarë dhe të na bashkojë interesi i përgjithshëm, e natyrisht edhe kjo ditë për çfarë po diskutojmë, sot buxheti komunal i Malishevës. Ne si LDK e kemi analizu materialin edhe buxhetin, ky buxhet përfshin investime kapitale të shumta në fshatra, që ka qenë kërkesë e vazhdueshme e LDK-së për çka edhe i mirëpresim. Buxheti e përfshin edhe një investim që është e pritshme për qytetarët e komunës së Malishevës, fillimin e investimit me ujësjellsin e komunës së Malishevës, ndaj kërkoj edhe nga kolegët që ta përkrahin këtë buxhet. Buxheti përfshin dhe subvencione të shumta në kulturë, rini, sport, arsim, pa e anashkuar edhe subvencionin që do të ndodhë në bujqësi, kërkoj nga ekzekutivi që t'i rritë subvencionet në kulturë, sport dhe rini, por gjithashtu edhe bursa për studentët.

Kërkesë e vazhdueshme e kam parë që ka qenë edhe në legjislaturën e kaluar renovimi i Sallës së Kuvendit, me këtë buxhet po bëhet jetik, kërkoj nga Kryetari dhe Kryesuesi i Kuvendit që këtë çështje ta përshpejtojnë, sepse po shihet edhe gjendja e Kuvendit, pa dashur të hyjë rend si përfaqësues i fshatit Ngucat, i mirëpres edhe investimet që janë të futura në këtë buxhet, investime në rrugët lokale, hapja dhe zgjerimi i rrugës fushore të rrugës Mërkaqi, natyrisht dhe investime të shumta që do të ndodhin, rregullimi i oborrit të palestrës që është nevojë e kohës gjithashtu edhe renovimin e disa shkollave. Kërkoj nga ekzekutivi që të ketë trystni të madhe te kompanitë që e bëjnë furnizimin me material higjienik nëpër shkolla. Duke parë të gjitha këto investime ky buxhet do ta ketë përkrahjen e LDK-së, pres përkrahjen edhe nga anëtarët e tjerë të Kuvendit. Faleminderit!

Fatmir Ademaj, Kryesues i Kuvendit: Urdhëro, *Veton Zogaj!*

Veton Zogaj, nga LVV: Përsëritet Kryetar, kolegë asambleistë!

Kryetar e kam një pyetje meqenëse është pika e rendit ditës më e rëndësishmja në legjislaturë, kush ka qenë asambleistë e di këtë çështje edhe ata të rinjtë besoj e dinë. Sot e diskutojmë projektbuxhetin për vitin 2026-2028 me theks të veçantë 2026, edhe Kryetari ende nuk na ka prezantuar një Kabinet Qeverisës me të cilin ka me implementu projektbuxhetin, të cilin sot e prezantoi. Ne e kemi pasë një debat për këtë draftbuxhet edhe në legjislaturën e kaluar, e cila nuk i ka marrë votat, për arsye që i kemi dhënë vërejtjet tona dhe të cilat nuk janë përmisuar dhe nuk janë marrë parasysh nga qeverisja komunale.

Kryetar i kam disa pyetje konkrete për mos me u përsëritë në ato që i kemi thënë edhe në shtator që i kemi diskutu: e para dua ta di saktë sa është borxhi total i Komunës së Malishevës, sepse ju në këtë projektbuxhet e keni kërku prapë me votu diku 1.3 milion euro për investime në Sheshin e Dëshmorëve në Malishevë, me datën 8 gusht e keni bërë fushatën e keni promovu si projekt të përfunduar edhe realisht jeni mbytë tue promovu në fushatën elektorale: parkingun, platonë, lulet e gjithçka tjetër, në fund një rigë e shiut i mori lumi të gjitha.

Sa është borxhi i kompanisë që e ka ndërtu këtë projekt, dhe pse po kërkohen sot mbi 1,3 milion euro shtesë për me u investu në projektin e qytetit? Ndoshta 163 mijë euro janë të arsyeshme për ndërtimin e Memorialit në Shesh, të cilat na i tha profa atë ditë në KPF, por 1.2 milion euro të tjera nuk po mundem me arsyetu se çka të duhen shtesë, kjo është vetëm me kry borxhin që i keni mbetë kompanisë!

E dyta kush ka qenë asambleistë dhe kush e ka përcjellë Kuvendin Komunal në katër vitet që i lamë pas, ky rregullim i kolektorit kryesor prej 2.5 kilometra ka qenë prej vitit 2020-2021 në projektbuxhete, d.m.th. vetëm vendoset si shumë, kërkohet me u miratu, kurrë asgjë nuk bëhet. Kanalizimet vazhdojnë me ndotë lumin Mirusha edhe ndodh dështimi siç na ndodhi me këtë fatkeqësi natyrore që ndodhi 2 javë më parë. Pse e qitni në projekt dhe, pse nuk merrni diçka konkrete me e realizu? Ku është faji që gati gjysmë milioni kërkohet edhe nuk bëhet asgjë?!

Pastaj i kemi të përsëritura plot rrugë nëpër fshatra të cilat kanë kosto zero, ta zëmë renovimin e rrugëve lokale në fshatrat Vërmicë, Carrallukë, Shkarashnik, Bellanicë, Ngucat, Dragobil, Pagarushë, Lubizhdë, Turjakë, koston e kanë zero. Pse figurojnë në projektbuxhet kështu? Më poshtë rregullimi i kanalizimit: Bubavec, Kijevë, Drenoc, Banjë, lagjja Mirdita në Malishevë, koston e ka zero, pse del kështu ky projekt dhe ka koston zero? Prapë e kemi të ndamë si kategori dhe i kam kërkuar me sjellë si draft të shënuara emrat e rrugëve, sepse nuk mund ta dime se për cilën rrugë po bëhet fjalë?

Ndërtimi i trajtimit të pastrimit të lumit Mirusha me një vend kërkohen 500,000 euro dhe me një vend tjetër 50,000 euro shtesë, në rregullimin e rrugëve anësore, pse nuk janë bërë me një kategori të caktuar dhe me u mbledhë shuma totale 550,000 euro, por ndahen kështu? Ai është një projekt pastrimi dhe rregullimi i fshatit? Lumi Mirusha prej urës në qendër të qytetit deri në urën mbi tranzit. Pse figuron kështu e ndarë dhe, a mundemi me ditë sa ka me investu komuna këtu? E dimë që komuna është në bashkëfinancim me nivelin qendror përmes grandit të performancës që ka dhënë një pjesë. Sa është shuma totale nëse në vitin 2026 ka kushtuar 500 mijë euro, sa kërkohen në 2027-2028, kur do të përfundojë si projekt?

Çështja tjetër, ju e keni pasë në fushatë Malisheva Urbane në të kaluarën, i keni pasur dy projekte të Malishevës Urbane, rrugën Ish-“Rilindja kombëtare” – Ibrahim Mazreku, tani Bulevardi dhe Sheshin e Dëshmorëve, keni thënë në katërvjeçarin e ardhshëm kemi me u fokusu në infrastrukturën nëpër fshatra, tani e kemi një buxhet për investime kapitale mbi 5.3 milion euro, e kemi 1,210,000 euro që duhet me u investu ose me la borxh për tek Sheshi. E kemi lumi Mirusha 500,000 euro, nuk jam kundër me investu në Shesh. E kemi Palestrën Sportive “Ibrahim Mazreku”. Dmth shkoi komplet buxheti për investime në Malishevë, ndërsa 15 fshatra e keni vendosë një shumë buxhetore prej 50,000 euro për renovimin e rrugëve. Më thuani ju mua me shtru asfaltë 50,000 mijë euro sa metra bëjnë me u shtru? Burimi është profesionist i kësaj fushe ky mundet me na tregu se sa kushton një oborr me shtru në kubëza (kocka), kushton 50 mijë euro, kjo është hajgare kështu me qytetarë.

E dimë që i keni votat edhe e kaloni, qysh e keni kalu katër vitet e tjera, mirëpo puna nuk po përfundohet. Këto kush po i përcjell kolegë asambleistë nëse pritoni me i lexu të gjitha projektbuxhetet e viteve paraprake merrni këqyrni procesverbalet në web faqen e komunës edhe i shihni këto diskutimet e mia; Valjeta, Burimi dhe të tjerët që kemi folë për këto projekte një nga një edhe prapë sot i gjejmë prej 2021 të përsëritura. D.m.th. po mjafton me ju qitë hi syve qytetarëve me iu thënë e kam vendos një rrugë tek lagjja jote, por kur realizohet nuk i dihet. Kur ka me ardhë koha me u realizu ajo s'bëhet kurrë, thoni që na jemi të zhytur në borxhe i kem kompanisë, janë pllakatat e "Famis-it" ato nuk guxon m'i largu, sepse i kemi borxhe dhe pa e la borxhin nuk po mundemi me i largu. Po më vjen keq që po duhet me i diskutu në këtë mënyrë, po nuk po ka alternativë tjetër, ka me ardhë një moment që edhe qytetarët nuk ta japin votën. Nëse ti vazhdon m'i përsëritë projektet buxhet pas buxheti asnjë prej këtyre nuk gjen zbatueshmëri është hajgare.

Faleminderit shumë!

Fatmir Ademaj, Kryesues i Kuvendit: Urdhëro, *Enver Hoti*!

Enver Hoti, nga AAK:

I nderuar Kryetar, i nderuar Kryesues, media, të nderuar qytetarë të Komunes sonë, të nderuar asambleistë.

Sot unë mendoj që duhet të ishte një ditë e cila do të na bashkonte të gjithëve si asambleistë pavarësisht cilit subjekt i takojmë dhe cilit pozicion i takojmë: pozitë apo opozitë, sepse jemi duke trajtur temën më jetike dhe më të rëndësishme për qytetarët e Komunës, siç është buxheti i Komunës sonë. Buxheti i cili do ta garantojë dhe do ta sigurojë mirëqenien, të arriturat dhe zhvillimin për ata dhe çka e presin qytetarët.

Kryetar nuk isha në prezantimin që e bëtë në fillim, po u mundova pak a shumë ta përcjell edhe Drejtorin e Financave, dhe unë i kam disa çështje të cilat dua t'i shpreh. I kam disa vërejtje në fillim në organizimin e kësaj seance mendoj që keni pasur kohë të mjaftueshme nuk është dashtë të thirret seancë e jashtëzakonshme, është dashtë ta kemi kohën e mjaftueshme dhe të furnizohemi më herët me materiale, apo me dokumente të nevojshme dhe ta trajtojmë në mënyrë më të qetë me kohë pak ma të gjatë edhe t'i japim propozimet tona.

Vërejtja e dytë Kryetar është me luajtë një rol më pozitivë m'i ofru opozitës bashkëpunim, sepse kemi të bëjmë me buxhetin, dhe ai është i të gjithë qytetarëve. Ne kemi disa projeksione tona që mendojmë që janë në interesin e qytetarëve, të bëhemi pjesë e këtij buxheti pse jo. Nëse fokusohemi vetëm në numra, atëherë e drejta e numrave e jep mundësinë dhe të drejtën, por nëse fokusohemi te interesi i qytetarëve ne si përfaqësues të tyre, mendoj që është dashtë me pranu opozitën dhe të ndikosh më shumë që të krijohet një hapësirë së paku e diskutimeve. Me mundësi që ne të jemi pjesë aktive në projektet buxhetore e sigurisht do të kishim ndihmuar më shumë në realizimin e këtij procesi.

Nëse hyjmë te tema që jemi sot unë i kam disa vërejtje se këtu e pamë edhe njëherë që po vazhdon investimi në Shesh, është një pyetje direkte a përfundon me këto mjete, me këtë projektion investimi? Sheshi icili është diskutuar mjaft gjatë dhe nuk do të marrë kohë më shumë, është një shumë jashtëzakonisht e madhe e cila kalon mbi 1,200,000 euro si vazhdimësi e atij projekcioni investiv, dhe a përfundon me këtë projektion me këto të dhëna 1,200,000 euro? Është një pyetje që mendoj që e presin edhe qytetarët, dhe ju e dini që unë nuk jam që të ndërprehet, jam që të vazhdohet të realizohet, por a përfundon këtu?

Ajo që kishte qenë mirë sot që ky projektbuxhet nuk e acepton si problem të tillë qendrën siç është parë këtu, por e tha Drejtori i Financave për disa projekte që janë këtu shumë të rëndësishme në vazhdimi në zhvillimin e ardhshëm 2026-2028, janë të planifikuara shumë projeksione nëpër fshatra me akse, por pa informacion shtesë. Ishte dashur t'i sillni ato projekte ta kishte lehtësu ty punën, ndoshta si të tilla s'mund t'i dërgosh në Ministri të Financave, së paku ne jemi këtu nuk jemi në Ministri të Financave, sepse ndoshta nuk kish thënë ndonjë zyrtar në fshat që ka një autoritet shtesë që të thotë, po dua me ndërru këtë rrugë me vendos këndeje, sepse kam vota apo nuk kam vota, e kishim ditë pse po votojmë për cilin projekt, për cilën rrugë, sa gjatësi çfarë përmase. Nuk ish bërë asgjë me sjellë një aneks shtesë me të dhëna që janë të nevojshme.

Kryetar ka këtu disa të dhëna tjera që i përfshijnë disa fusha për qytetarët e Malisheves që janë të rëndësishme, për shembull gjendja në arsimim që mendoj është dashur të bëhen projeksione më të detajuara, me investime më të mëdha, sepse nuk e kemi mirë gjendjen në shkolla, me investime të cilat në këtë rast garanton një proces të qetë dhe të mirë zhvillimor. Në rini i shikova nëse nuk gaboj afër 200,000 euro ishin, të cilat janë pak. Po ashtu në bujqësi i keni planifiku 200,000 euro, e kemi edhe drejtorin këtu që e pyeta se a të ka pyet kush ajo kur ka qenë si propozim me hy në projektbuxhet që e mendoj pak, besojmë ke pasë mundësi si pjesë e qeverisë komunale me shtu financimin edhe investimin në këto çështje.

Nuk kam parë që keni bërë ndonjë planifikim ose së paku inicim për t'u bërë një zhvillim ekonomik, sepse bizneset kanë nevojë dhe ata presin që Qeveria Komunale të ofrojë infrastrukturë financiare, po edhe infrastrukturë tjetër administrative, që bizneset të zhvillohen akoma më shumë. Mendoj që duhet të mendohet seriozisht për zhvillimin ekonomik, unë ia kisha propozu Kryetarit që të mbahet edhe një seancë tjetër dhe ta diskutojmë pozitivë dhe opozitivë dhe të na përmisoni në ato çka i ceka më herët, nëse i ka Drejtoria e Urbanizmit, na furnizoni edhe me ato t'ia shtojmë edhe të bëhemi pjesë e votimit. Nuk e di sa e merrni parasysh, por mendoj që do të ishte mirë që m'u konsultu edhe m'u mbajtë edhe një seancë e vazhdueshme tjetër.

Ju faleminderit.

Fatmir Ademaj, Kryesues i Kuvendit: Urdhëro, *Amrush Helshani!*

Amrush Helshani, nga Nisma Socialdemokrate:

Faleminderit për fjalën i nderuar Kryesues, z. Fatmir Ademaj, i nderuar Kryetar i Komunës, zotri Ekrem Kastrati, të nderuar kolegë dhe anëtar të Kuvendit të Komunës së Malishevës, media. Meqenëse zyrtarisht është fjala ime e parë në këtë përbërje të Kuvendit të Komunës së Malishevës, më lejoni që fillimisht t'ju uroj të gjithëve për mandatin e marrë duke dëshiruar punë të mbaë bashkëpunim dhe përfaqsim dinjitoz në shërbim të qytetarëve të Komunës së Malishevës. Falënderoj nga zemra të gjithë votuesit nga çdo fshat, nga çdo lagje, për besimin që më kanë dhënë që të jem përfaqësues i tyre në Kuvendin Komunal. Në mënyrë të veçantë dua t'i falënderoj bashëvendasit e mi nga Ngucati si dhe mërgimtarët tanë për mbështetjen dhe besimin ndaj kandidatures sime, sepse ky është besim që më obligon të jem zë i përgjegjshëm dhe përfaqësues korrekt i interesave të qytetarëve të Komunës së Malishevës padallim.

Të nderuar antarë të Kuvendit, qytetarë të Komunës së Malishevës sot ne po shqyrtojmë dhe po votojmë një projektbuxhet për vitet 2026 -2028, një dokument tejet të rëndësishëm për zhvillimin e komunës sonë. Ky buxhet reflekton Programin qeverisës, prioritet zhvillimor dhe angazhimin institucional për përmirësimin e jetës së qytetarëve, e vlerësoj këtë projektbuxhet si realist dhe të orientuar drejt nevojave konkrete të qytetarëve në çdo fshat, duke përfshirë investime në infrastrukturë, arësim, shëndetësi, bujqësi, mirëqenie sociale, barazi gjinore dhe zhvillim ekonomik lokal. Besoj se ky buxhet është ndërtuar mbi parimin e përgjegjësisë, transparencës dhe shpërndarjes së drejtë të mjeteve publike dhe do të ndikojë drejtpërdrejt në përfaqsimin e shërbimeve dhe krijimin e kushteve më të mira për jetë në komunën e Malishevës. Me këtë frymë shpreh mbështetje të plotë për miratimin e këtij buxheti me bindjen se zbatimi i tij do të sjellë zhvillim të qëndrueshëm dhe përfitime konkrete për qytetarët tanë.

Faleminderit.

Fatmir Ademaj, Kryesues i Kuvendit: Urdhëro, *Sylë Dukolli!*

Sylë Dukolli, nga Nisma Socialdemokrate.

I nderuar Kryesues, përshëndetje Kryetar, Drejtor i Financave dhe ju të gjithë asambleistë, urime të gjithëve mandati dhe ishalla jua përmbush kërkesat të gjithë atyre që ju kanë votuar. Jemi në ditën e aprovimit të buxhetit për vitin 2026, buxhet ky siç tha edhe drejtori është hartuar më herët, unë mendoj që është i pranueshëm sa i përket shpërndarjes së buxhetit nëpër kategori të ndryshme nëpër fshatra. Unë në cilësinë e drejtorit që kam qenë këtu në seancë besoj përherë e kam parë që ka pasë kërkesa të vazhdueshme nga ju që vini nga fshatrat e ndryshme për mos investime në fshatra për arsye të projektit të madh dhe që e ceku dikush që i keni dhe disa mjete borxh. Po flas për shefin e grupit të LVV-së, ju keni thënë që nuk keni me mujtë me dalë prej borxhit, m'u duk shumë pak çka the ti, sepse është punu shumë. Në anën tjetër një përfaqësues i PDK-së pra Burimi që e përshëndes, realisht çka ka folë ka folë jashtë vetes.

Të kisha thënë që kush të ka thënë ashtu me folë, fol brenda vullnetit tënd se unë të njoh dhe e di që nuk ke folë brenda vullnetit tënd, por në politikë këto gjëra lejohen. Më pëlqej fjalimi i Enverit, jo që e kam shok të mirë, por në kategorinë që kam udhëhequr në drejtorinë time, më kanë pyetur, por mua vetëm pak mjete me m'i ofru unë bashkëpunoj me organizata të tjera dhe ia dal, kurrë më shumë nuk është dhënë se që 3 vjet subvencione për bujqit dhe fermerët e komunës së Malishevës. Buxheti i shpërndarë në të gjitha fshatrat ishte në mënyrën më të drejtë të mundshme. Çdo fshat do të ketë asfaltim të rrugëve të vogla nga 200/300 metra sa kanë mbetë, kanalizime, infrastrukturë përcjellëse që besoj se do t'i prekë të gjitha lagjet e fshatrave tona. Besoj që edhe ato do të bëhen më urbane dhe ndriçim, i cili është i kontraktuar edhe pse buxheti na dënon për 500,000 - 600,000euro më pak për shkak të numrit të banorëve i cili është bërë nga regjistrimi i fundit. Të gjithëve na bjen mirë me këtë projekt çdo fshati çdo banori të komunës së Malishevës. E meriton aprovimin tuaj dhe kërkoj që bashkërisht të dalim sikur qysh kemi dalë nganjëherë me një miratim të përgjithëshëm të buxhetit nga të gjitha grupet duke ju falënderuar dhe duke ju thirrë për angazhime. Ju falënderit Kryesues për fjalën që ma dhe.

Fatmir Ademaj, Kryesues i Kuvendit: Urdhëro, *Valjeta Hoti!*

Valjetë Hoti, nga PDK: Faleminderit Kryesues, përshëndetje për të gjithë!

Meqë është hera e parë që po ju drejtohem në këtë seancë, shfrytëzoj rastin me ju uru të gjithë juve kolegë, po ashtu uroj që kjo sallë, kjo hapësirë të na shërbejë si hapësirë dialogu, respekti dhe vendimmarrje në të mirën e qytetarëve. Veton unë pajtohem me atë çka the ti pak më herët që po mjaftojke një analizë e shpejtë edhe shumë lehtë me ardhë në përfundim që buxheti i ri, projekte të vjetra që nuk na kanë dhënë rezultat as në mandatin e kaluar. Fokusi prapë kish mbet i njëjtë planifikim nuk pashë dhe si projektbuxhet nuk po premtojke ndonjë dryshim real, dhe si asambleiste e mandatit të kaluar e them me bindje që asnjëherë nuk kemi pasë raport ose analizë për këto projekte dhe tani këto investime ju që i keni paraparë përsëri në këtë projektbuxhet se çka po punohet edhe deri ku kanë arritë këto punime, andaj e them që edhe ky projektbuxhet që nuk po premtojka transparencë.

Pse mendoj kështu? Se financimi i investimeve kapitale mjafton m'u ndalë te pjesa e arsimit ku e kemi ndërtimin e shkollës fillore në Turjakë në vitin 2022 në projektbuxhetin që është parapa për periudhën 2023/2025 është caktuar një shumë prej 100,000 euro, në projektbuxhetin 2025/2027 në vitin 2023 që është miratu ky projektbuxhet e kemi paraparë totalin prej 192,000 euro, e për këtë projektbuxhet kish arritë shumën prej 265,000 euro. Keni parapa investime të reja renovimin e shkollave që po përsëriten vazhdimisht, sa shpesh duhet me ndodhë ky renovim? Kush i përcakton që këto renovime duhet me u përfshi në projektbuxhet, sepse po flasim për shkollat që kanë mungesë të elementeve, të kushteve bazike, shkollat që nuk kanë printer edhe ato që kanë printer çdoherë kanë mungesë letre ose ngjyre. Po flasim për shkolla që nuk kanë kabinete, po ashtu edhe lëndët djegëse për çdo dimër janë mungesë.

Te planifikimi hapësinor dhe urban e kemi edhe ndërtimin e qendrës, Sheshit që është i ripërsëritur, është ndërtimi i rrugës Habib Berisha deri te stadiumi dhe oborri i qendrës sportive, prapë ishin përsëritë si investime të reja edhe në këtë projektbuxhet. Ndërtimi i rrugëve ishin përmendur 2-3 lagje edhe ishin shku kësaj here me akse puna që më lehtë me kriju konfuzion te ata që e marrin këtë projektbuxhet edhe e lexojnë. Pastaj ke edhe rregullimin e kolektorit të ujërave të zeza e ceku edhe Vetoni është 2.5 km prej vitit 2022 nuk është punë me përfundu. Ke edhe renovim të rrugëve Drenoc, Carrallukë, Vermicë, Shkarashnik, unë jetoj në Carrallukë edhe nuk kam parë ndonjë renovim ose ndonjë ndërtim të rrugëve që po bëhet apo që është bërë edhe më herët.

Është edhe rregullimi i kanalizimeve kemi edhe mjekësinë e kemi ndërtimin e QMF-së në Kijevë, ndërtimi i Shtëpisë për persona me aftësi të kufizuara ka edhe disa prej tyre, por shkoja në disa që i mendoj si më të rëndësishme dhe mos me zgjatë më shumë. E kam një pyetje për juve, pse neve na duhet me votu këtë projektbuxhet me krejt këto mangësi, të gjitha këto të meta, projekte prej mandatit të kaluar që kanë fillu mjetet janë ndarë edhe nuk kanë përfundu.

Falënderit.

Fatmir Ademaj, Kryesues i Kuvendit: Urdhëro, *Demir Bajra!*

Demir Bajra, nga PDK: Përsëritet asambleistë, zotëri Kryetar, Ekrem Kastrati!

Është hera e parë në këtë legjislaturë që po e marr fjalën, ju përgëzoj për mandatin e dytë, ju uroj shëndet dhe punë të mbarë! Po kyçna menjëherë në projektbuxhetin e paraparë për vitin 2026/2028 në kohën kur kemi ardhë ne asnjëherë nuk besoj qoftë PDK, VV, NISMA, LDK p.sh: të jemi kundër një subjekti politik, por paraprakisht është mirë që të mundohemi ta ndajmë këtë pjesë, këtë hise që e kemi në minues në bazë të banorëve për disa mija euro edhe ne është mirë që t'i shohim me Kryetarin, me dikasteret që ta bëjmë një ndamje proporcionale e jo sipas mundësive partiake dhe të investojmë.

Kur është fjala për renovime në shkollë unë di që ka një fshat që 99% e njohin të gjithë e pashë rinovimi shkollës "Asim Vokshi" Panorc, Kryetar po të drejtohem direkt mua më ka prekur shumë, sepse është një investim bukur mirë aty, dhe ajo shkollë, sapo ka filluar nuk i ka as 2 vjet që është prerë shiriti. A është bërë gabim teknik prej dikujt nuk e di, por besoj diçka nuk e pashë në rregull, sepse te masa, te qytetarët e komunës së Malishevës kjo ndikon shumë. Burimi tha që nuk do të jemi pro, sepse nuk kemi bashkëpunim, Kryetar ne prej 3 dhjetorit kemi ardhë në këtë Kuvend duke thirrur mbledhje urgjente, të jashtëzakonshme dhe uroj që mbledhja e ardhshme mos të jetë e jashtëzakonshme, por të jetë mbledhje e rregullt. Edhe po bazohem tek organet e fshatrave që i keni zgjedhur keni qenë edhe ju vetë aty që isha prezent, i kemi kryetarët e Bashkësive lokale, a duhet të vetëdijesohemi ndonjëherë si shoqëri që t'i respektojmë edhe ata që janë zgjedhur nga qytetarët, a do të mirren parasysh kërkesat e Bashkësisë lokale të vijnë deri këtu, të merret parasysh. Që nga viti 2012/2013 ne kemi ardhë në pushtet, unë kam qenë pjesë e Nismës janë projektet të bartura Kryetar, për ata po flas me sinqeritetin më të madh njerëzor dhe moral që kam.

Projektet e bartura prej vitit 2013 e deri më sot, t'i silleni këtu në projektor i shohim projektbuxhetin prej vitit 2013 e deri më sot i shohim që vetëm bartën. Së paku ta kemi një mirëkuptim edhe ne nuk jemi të kënaqur që mos me votu projektbuxhetin për vitin 2026-2028, edhe ne jemi pjesë e Malishevës, dhe ne jemi taksapagues të Malishevës. Nuk jemi armiq të Nismës, por jemi vëllezër, jemi shokë kështu që kërkoj Kryetar ta shtyjme dhe ta gjejmë një modalitet dhe ta gjejmë një konsensus, sepse as ne nuk jemi të kënaqur që mos të votohet projektbuxheti për vitin 2026-2028 nga PDK-ja.

Fatmir Ademaj, Kryesues i Kuvendit: Urdhëro, *Veton Zogaj* një minut replikë!

Veton Zogaj nga LVV: Replikë edhe për ju Kryesues praktika e kuvendit, qoftë Kuvendi i Republikës apo dhe kuvendet e tjera komunale është mirë që replikën e merr dhe pse kanë kërkuar të tjerët fjalën, e merr menjëherë pasi ta përfundojë parafolësi, sepse i humb kuptimi. Sylja ka përvojën e duhur besoj që e di që nëse një projektit i prehet shiriti dhe promovohet ai kuptohet që është përfunduar çdo obligim, edhe financiar dhe çdo gjë pastaj bëhet promovimi. Kaq kisha, pyetja ime ishte shumë e drejtë jo tendencioze që opinion publik, taksapaguesit në këtë vend duhet ta dinë se sa borxh i kemi kompanisë që i ka bërë punimet e Sheshit të Dëshmorëve në Malishevë.

Fatmir Ademaj, Kryesues i Kuvendit: Veton vlerësoj që të gjitha pyetjet që janë duke iu bërë drejtori dhe Kryetari i Komunës në fund do t'i trajtojnë. Kështu që fjalën e kaloj te *Halili!*

Halil Morina, nga Nisma Socialdemokrate:

Në mbledhjen e ardhshme është mirë secilit me ia sjellë Rregulloren e Punës së Kuvendit, secili anëtar i Kuvendit me pasë parasysh se kur ka të drejtë me marrë fjalën, sa minuta ka drejtë, dhe kur ka të drejtë të bëjë replikë. U cekën vërshimet sa herë që ndodhin fatkeqësi natyrore kjo e fundit që ka ndodhë në vendin tonë dhe në komunën tonë, njerëzit bëhen bashkë në fatkeqësi natyrore, bëhen bashkë me u bë ballë sfidave dhe problemeve që i sjellin këto fatkeqësi natyrore. Kur mbaron fatkeqësia natyrore pastaj mundemi me i pasë kritikën tona për gabimet të cilat ka mundur t'i bëjë dora e njeriut dhe që ka shkakton ende më shumë problem në fatkeqësi natyrore. Atë ditë që kanë ndodhur vërshimet unë i kam parë shumicën e kolegëve këtu opozitarë që në atë moment kanë filluar të bëjnë kritika politike, kjo më bënë me kuptu që këta nuk i ka shqetësuar fakti që po ndodhin vërshimet, por janë përpjekur me i instrumentalizuar këto probleme të vërshimeve me ndërtu argumente politike.

Është disfatizëm politik me pritë prej fatkeqësive natyrore me të ndihmu ty për të bërë politikë përmes fatkeqësive natyrore. Shpresoj që kurrë mos të ketë fatkeqësi natyrore në vendin tonë, në komunën tonë, por sa herë që të ketë ëshë mirë të bëhemi bashkë me i tejkalu ato fatkeqësi dhe pastaj me u marrë me problematikat tona dhe dorën e njeriut. Qyteti jonë ka nevojë për trajtime të ujërave, sidomos në dalje të qytetit në mënyrë që me hap rrugën ujit mos me u mbledhë, sepse kjo dihet që kur të mbledhet uji do të vijnë në nënkalim në parkingun nëntokësor, pra nuk është faji i nënkalimit dhe parkingut nëntokësor, faji që nuk janë trajtu ujërat në dalje të qytetit dhe këto ujëra do të mbledhen diku dhe kanë me gjetë ku është pika më e ulët për me u tubu.

Ky projektbuxhet në secilën kategori ka pak para, por këto janë mundësitë tona nuk kemi më shumë para për me i rritë, mirëpo detyrë e ekzekutivit dhe e të gjithë neve është që me pa mundësi dhe me gjetë alternativa tjera për m'i ndihmu këtij buxheti. E ceku Sylja në mandatin e kaluar Qeveria, Kryetari i Komunës kanë bashkëpunu me shumë organizata, ndërkombëtare janë përfituar më shumë se 1 milion euro vetëm prej "Qatar Charity," në bujqësi dhe sektorë të tjerë. Me organizatat e brendshme kemi bashkëpunu me "Jetimat e Ballkanit", mbi 2 milion euro investime për kategorinë e fëmijëve me nevoja të veçanta dhe pleqëve. Kjo është hapësira e qeverisë që nuk bazohet vetëm në buxhetin e vetë, por gjen alternativa, fonde, donacione për me i plotësu nevojat e qytetarëve. Me pasë qenë në opozitë kurrë nuk kisha kërkuar të bëjë bashkë buxhet me qeverinë, nëse qeveria e ka propozu një buxhet kisha dalë kisha thënë që ky buxhet nuk është i mirë, t'kisha qenë unë në pushtet paratë i kisha dërgu në këtë projekt, dhe kisha kërkuar prej qytetarëve që herën tjetër të më votojnë mua, sepse unë kam ide më të mira për buxhetin sesa këta që janë në pushtet. Me kërku ta bëjnë bashkë buxhetin është me kërku me u bërë pjesë e qeverisë, është e vërtetë që në pika të caktuara ne mund të bëjmë bashkëpunim me marrë ide prej njëri-tjetrit, por nëse kërkohet me u ulë ta bëjmë bashkë buxhetin atëherë këtu më nuk ka pozitë e opozitë, nuk ka më demokraci, por ka sistem njëpartiak dhe shlyqyr që nuk e kemi më atë sistem.

Fatmir Ademaj, Kryesues i Kuvendit: Urdhëro, *Enver Hoti* replikë!

Enver Hoti, nga AAK: Është dashur që ky projektbuxhet të miratohet vitin e kaluar meqë jemi ardhë në këtë pikë është dashur ne me pasë propozimin me kohë dhe me trajtu. Kemi të drejtën si përfaqësues opozitarë me dërgu projektsionet tona përmes administratës rrugëve që janë krejtësisht legjitime dhe me kërku si propozime. Nëse i kish fut qeveria Komunalet në buxhetin aktual mirë, nëse jo kaq, askush nuk është duke kërkuar me u ulë me bërë qeverinë bashkë. Kjo është një retorikë që e gënjen publikun, gënjeshtër shmangëni. Ne kemi kaluar një situatë të vështirë dhe është dashur që së paku me pas një ndryshim ky projektbuxhet që me fillu një fazë të planifikimit, sepse prapë do të bjerë shi, prapë do të kemi një situatë të tillë dhe ndoshta planifikimi buxhetor i qeverisë qendrore pas gjashtë muajve kemi mundur ta bëjmë një kërkesë të planifikuar mirë të trajtuar mirë që me fitu një investim, sepse Komuna nuk e ka potencialin m'i marrë të gjitha masat t'i sanojë dëmet të cilat e dëmtojnë Komunën tonë. Vërshimet janë të përditshme, prandaj ne si institucion duhet me vepru dhe m'i parandalu këto, jo m'i lënë në mëshirën e Zotit. Nuk kemi bërë politikë me vërshime, por kemi mbështet publikisht të gjitha masat të cilat i ka marrë komuna dhe ekipet përkatëse. Mendoj që është e arsyeshme me pasë një mundësi sidomos në situatën e emergjencave, që me u obligu ne si institucione me na u hap rruga me kërku diçka me na investu. E ke gjendjen te diga është jashtëzakonisht e rrezikshme, rrezikon dhjetra jetëra të qytetarëve. Opozitës t'i jepet një hapësirë, sepse buxheti është i taksapaguesëve të Malishevës. Ju falënderit.

Fatmir Ademaj, Kryesues i Kuvendit: Duke e pasur në konsideratë të kaluarën tëndë si Kryesues i Kuvendit por edhe në pozita shtetërore nuk ju ndërpreva fare, në të njëjtën kohë kërkojë nga antarët e Asamblesë Komunalet ta respektojnë minutazhin në këto pika.

Urdhëro për replikë *Halil Morina*.

Halil Morina, nga Nisma Socialdemokrate: Për çështjet të cilat unë i ngrita pjesa më e madhe e antarëve të Kuvendit prej opozitës i kanë thënë të njëjtat gjëra pak a shumë. Kështu që kur unë flas nuk gënjej e jap opinionin. Askush nuk ka thënë që anëtarët e Kuvendit nuk kanë të drejtë me dhënë propozime këtu, por e kanë hapësirën mund t'i japin propozimet e veta këtu, por kjo puna e spekulimit politikë, e gënjeshtërs nuk kanë të bëjnë fare me mua, as me fjalimin tim, atë çfarë e thashë unë e thashë opinion timin dhe i qëndroj opinionit tim. Uroj që këtë vit mos të ketë fatkeqësi natyrore, por nëse do të ketë mos të përdorin politikisht të paktën kur është duke ndodhur ajo fatkeqësi natyrore, mbasi të mbarojnë ato pastaj mund të ngrisim shqetësimet dhe shohim ku i kemi çështjet.

Fatmir Ademaj, Kryesues i Kuvendit: Faleminderit, fjalën e ka kërkuar Imrani. Urdhëro *Imran Xhyliqi*.

Imran Xhyliqi, nga PDK: Faleminderit do të ishte mirë me sjellë atë Rregullore, sepse më është lodhur dora duke e ngritur, dikush me folë tre herë e dikush asnjëherë nuk është në rregull. I nderuar Kryetar urime për zgjedhjen, i nderuar Kryesues të dashur bashkëkolegë asambleistë! Këtu para nesh e kemi buxhetin për vitin 2026-2027- dhe 2028 nuk kam marrë pjesë asnjëherë në debat për projektbuxhet, sepse nuk kam qenë asambleist në legjislaturat e kaluara, por unë kam bërë projekte në fakultet sa kam qenë, e kam bërë prezantimin e temave të ndryshme, një prezantim shumë më të mirë, më të detajuar dhe me kosto shumë më të vogla.

Sa i përket projektbuxhetit pikësëpari këtu më duket që kanë dështuar me dëgjim publik, sepse nëse keni mbajtur dëgjime publike ju e keni bërë me antarët tuaj të Nismës. Kjo është çështje kryesore që nuk keni marrë nevojat e qytetarëve, bashkëfshatarëve tanë nëpër fshatra, ju i keni futur në projektbuxhet vetëm nevojat ndoshta të antarëve të Nisma-s. Ju i keni përmendur kur e keni miratuar buxhetin për vitin 2025/2026 dhe 2027 e keni paraparë që në ndërtim në shesh mos me u ndarë asnjë cent më, sot janë ndarë mbi 1,200,000.00 €, kur ju e keni vlerësuar që në vitin 2024 që në vitin 2026 mos me u ndarë asnjë cent për Sheshin sot kjo vlerë 1,200,000.00 € a është borxh? A ka me u ndërtuar apo ka me u shtruar dukat nuk e di çfarë do të bëhet këtu?

Kur sheh këtë buxhet 10,000,000,00 € e sheh këtë park, Shesh, parking nënkallim 10,000,000.00€ plus tjetra jepen 1,200,000.00 € nuk e di çfarë janë duke bërë me këto para për besë, unë jam ekonomist vetë e di me bërë llogaritjen bashkarisht me Avniun edhe Burimin, një objekt banesor i cili është ndoshta dhjetë kate dhe ka njëqind parkingje poshtë nuk kushton 10,000,000.00 € m'u ndërtu, kjo më habit, plus i jepen edhe 1,200,000.00 € shtesë kjo nuk ka sens. Një tjetër temë e cila ka vlerën prej 70,000.00 € rregullimi i parkut te Sheshi në qendër të Malishevës ku gjendet ky park, unë nuk jam duke e parë ndoshta unë jam verëbuar nuk jam duke e parë, të paktën nuk ka park. Gjëja e vetme kryesore e cila nuk është përmendur pas shumë replikave, e shumë thënieve e kemi ujësjellësin i keni ndarë 100,000.00€ për ujësjellës për vitin 2026, kurse vitin 2027 dhe 2028 e keni vlerësuar me zero që nuk ka nevojë për ujësjellës, ndërsa bashkëfshatarët tanë i çelin pusët me 10,000.00€ çdo ditë e ju e shihni që duhet me investuar me zero euro në ujësjellës, ose dil dhe thuaju Kryetar qytetarëve që nuk keni

ujë dhe nuk do të keni edhe për katër vjet sa do të jem unë, të paktën ashtu thuaju ose mos dilni këtu me na proklamuar asfalt, sepse jemi ngopur asfalt.

Sa i përket kësaj aksi një aksi dy dhe tre i keni përfshirë vetëm katërmbëdhjetë fshatra mos thuani krejt komunën e Malishevës i keni përfshirë aksi një, dy, tre, katër, pesë, dhe as ju vetë faktikisht nuk e dini çfarë keni bërë edhe e keni përfshirë aksi një edhe i keni ndarë 200,000.00€ kjo po më duket absurde. E vetmja gjë e cila më pëlqeu këtu është ajo që e ceku kolegja Valjeta dhe prej kolegut Vetonit për grumbullin e ujërave të zeza, e cila nuk është bartur çdo vit, të paktën nuk e kam parë që nuk ka përfunduar kurrë, me të vërtetë punës së mirë i them puna e mbarë, sepse nuk ju kam inat personal juve as si Kryetar as ju të tjerëve që jeni bërë bashkë. Unë punës së mirë i them puna e mbarë, mirëpo kjo nuk është punë e mirë 7,000,000.00€ për vitin 2026, 2027, 2028 për asfalt, kurse mos me paraparë asnjë cent për ujë kjo nuk është në rregull.

Fatmir Ademaj, Kryesues i Kuvendit: Ju lutem më shkurt sepse e keni përfunduar kohën.

Imran Xhyliqi, nga PDK: E di që e kam përfunduar kohën, por përderisa nuk ia tërhiqni vërejtjen askujt, deri tani mos ma tërhiqni vërejtjen as mua.

Fatmir Ademaj, Kryesues i Kuvendit: Ju lutem përfundojeni fjalimin!

Imran Xhyliqi, nga PDK: E keni paraparë te shëndetësia edhe te kultura rinia dhe sporti edhe tek arsimi më falni, nuk dëshiroj të futem te shëndetësia, por te kultura, rinia dhe sporti zero euro për rininë, asnjë euro s'keni paraparë t'ia ndani ndonjë të riu t'i jepni motiv me hap një biznes mos me dalë jashtë vendit? Zero euro i keni paraparë për organizatat joqeveritare, zero euro e keni paraparë për bursa, asnjë euro nuk e keni ndarë për organizatat e dala nga lufta. Ju e dini shumë mirë që Metushi shumicën e kohës edhe lulet që shkojnë te varrezat i blen prej buxhetit të vetë kurse e keni paraparë me zero euro.

Fatmir Ademaj, Kryesues i Kuvendit: Ju lutemi përfundojeni!

Imran Xhyliqi, nga PDK: Sa i përket Maralisë edhe e përfundova, sepse vij nga ky fshat.

Fatmir Ademaj, Kryesues i Kuvendit: Këtu nuk jeni i fshatit, por jeni anëtar i Kuvendit.

Imran Xhyliqi, nga PDK: Shumicën e votave i kemi marrë nga fshati. E përmendi Sylja nëse nuk gaboje që tha se nuk është projektbuxhet për PDK-në, por është për fshatra. A dëshironi t'i hyj me emra në Marali që i keni shtruar rrugët vetëm për anëtarët e juaj edhe ku është një antarë i PDK-së ose AAK-së që dëshironi shkojmë me emra. Po përmendi që shtatë vjet apo sa janë dritat në Marali vetëm te dyert e mia nuk kanë vendosur dritë, duke ia filluar rrugës prej Dragobilit deri në Pagarushë tek dyert e mia nuk e keni vendosur dritën, tjetra është që ju nuk e keni paraparë asnjë cent në Marali me investu mos hajdeni me lyp vota andej!

Fatmir Ademaj, Kryesues i Kuvendit: Faleminderit! Fjalën e ka *Bashkimi* pastaj *Burimi*.

Bashkim Krasniqi, nga Nisma Socialdemokrate: Faleminderit Kryesus i nderuar Kryetar, drejtorë të nderuar antarë të Kuvendit Komunal.

Urime të gjithëve mandati i ri shpresoj që do t'ju shkojë mbarë, ashtu si është thirrur kjo mbledhje si urgjente unë besoj që edhe këto që janë paraparë rregullimi i sallës rregullimi i ujërave etj. për shkak të vërshimit janë po ashtu urgjente dhe besoj të mirren me prioritet dhe të përfundojnë. Çështja tjetër që është paraparë në buxhet dhe kjo besoj që është me prioritet që mos me i quajtur të gjitha urgjente, është renovimi i rrugëve lokale në të gjitha fshatrat, besoj që është një prioritet që duhet pasur parasysh edhe me marrë menjëherë në fillim të këtij miratimi të buxheti. E kam shqyrtuar buxhetin do të thotë ka shumë projekte dhe investime, ka shumë shifra që mos të hyj t'i përsëris të gjitha, unë pajtohem me kritika që dhatë, mirëpo nuk e pashë që dikush ka marrë një kërkesë konkrete në Kuvend edhe e ka sjellë në Kuvend dhe kërkojnë që ajo pikë me u miratua. Unë mendoj që ajo është roli jonë, mundemi me repliku ka gabime ka edhe gjëra që munden me u përfshirë.

Ajo çfarë unë e pashë që ka shumë projekte, investime, por ka pak buxhet tek disa investime edhe janë grumbulluar për shembull: rregullimi i rrugëve i shumë fshatrave renovimi i shumë shkollave që nganjëherë unë mendoj që kanë me na dalë probleme në këtë aspekt, kështu mendoj që të bëhet një mbikqyrje e rreptë te ata që i marrin punët që do të thotë që i implimentojnë në teren për shkak se shpeshherë po na duhet me përsëritë prapë në renovim që e kemi pasur në projektbuxhet dhe nuk është kryer si duhet. Nuk po e them operator i papërgjegjshëm, por i papërgatitur, në këtë rast na duhet me ia shtuar mbikqyrjen që do me thënë mbikqyrja të jetë më e rreptë e të realizohen. Ajo çfarë mendoj që është më e rëndësishme me u paraparë është të jenë në projektbuxhe, bursat për studentë. Po ashtu edhe subvencionimet për klubet dhe sportin, që janë të vetmet forma që na me mbajtur rininë aktive dhe në vendlindje. Për fund projektbuxheti është dokument që në momentin kur miratohet është ligj. Unë kërkoj dhe uroj që të respektohet. Faleminderit!

Fatmir Ademaj, Kryesues: Faleminderit Bashkim! Fjalën e ka Burimi.

Burim Paçarizi, nga PDK: Asnjëherë besoj që asnjë qytetarë i Komunës sonë nuk është i kënaqur nëse ndodh ndonjë vërshim apo fatkeqësi në komunën tonë, apo edhe në shtetin tonë. Prandaj ne nuk jemi të kënaqur si është proklamuar në të gjitha mediat që opozita është e kënaqur me vërshimet, ajo nuk qëndron edhe është totalisht gabim, sepse asnjë qytetarë i Republikës së Kosovës nuk është i kënaqur me fatkeqësitë që ndodhin në vendin tonë. Prandaj është mirë edhe ne të kemi kujdes, edhe ju në adresimin e këtyre propagandave. Unë si asambleist edhe në mandatin e kaluar vërejtjet e mia i kam dhënë që nga detyra projektuse që nga dëgjimi publik në këtë sallë; i kam bërë mbi pesëmbëdhjetë pyetje kompanisë projektuese besoj jeni këtu, po janë edhe procesverbalet për të gjitha përgjigjet e prezantimet kanë qenë që këtë e ka vlerësuar komuna.

Gabimet projektuese që i kemi bërë ato po shfaqen, po dalin tani, nuk është që ne i dimë të gjitha, por nganjëherë ndoshta edhe puna profesionale edhe puna në terren ty të tregojnë disa problematika që mund të ndodhin në vazhdimësi dhe ato të evitohen. Ky parking po ka probleme të mëdha për arsye të një mospërfilljeje të Sëot-analizve, pa një analizë të mirëfilltë një projekt jetik për qytetarët e Malishevës normalisht që do të ketë këto shfaqje. Unë e kam edhe një pyetje për Kryetarin një temë me rëndësi është që këto vërshime, këto situata në vazhdimësi po na vijnë ndoshta për shkak të pakujdesisë sonë, unë nuk di se kush është duke i bërë projektet, shtrati i lumit duhet bërë me materiale të forta me beton d.m.th. është mënyra ma e keqe e rregullimit të shtratit të lumit. Nuk jam kundër investimit, por shtrati i lumit në këtë formë e ka arritur shpejtësinë e lëvizjes e ka dëmtuar ekosistemin, që verës ato gjallesa të cilat janë në ujë janë në cektinë është jashtëzakonisht keq. Nuk e di ku është marrë ai model ose ajo formë, por janë detaje shumë me rëndësi që në të ardhmen ka me shkaktuar telashe se ajo shpejtësinë e ujit ty ta ka arritur sasinë e ujit tek diga, kjo nuk është punë me ishalla por kjo punë është me matje. Duhet të jetë vizioni më i qartë të ketë përgjegjësi më shumë, ka analiza më shumë, urojmë që të funksionojnë mirë, por që të funksionojë në mënyrën më të mirë duhet të merren këto probleme. Mos të shkojmë te rreziku sepse nëse diga që e ceku kolegu më herët ka probleme ne e dimë që fshatrat të cilat janë mbrapa kanë me pasë dëme jashtëzakonisht të mëdha edhe te aspekti njerëzor dhe te aspekti ekonomik.

Të kemi kujdes të analizojmë, të trajtohen ujrat të trajtohet mënyra e funksionalizimit të një projekti, mbi 10,000,000 € investim. Kryetar është jashtëzakonisht jetik, është investimi më i madh i bërë në qendër të qytetit dhe mbrenda një afati tremujor që është bërë prerja e shiritit të kemi vërshime. Unë e kam thënë që uji në Malishevë vjen prej Berishës e nga Ngucat shumica nuk e kanë marrë parasysh, komplet ai ujë ty ta ka marrë parkingun, stacionin e autobusëve. Dëmet janë shumë të mëdha duhet të trajtohet kjo çështje. Edhe atëherë vërejtja ime ka qenë që Malisheva si situacion, toka është e përbërë me materiale të cilat e përçojnë lagështinë dhe niveli i ujit është një metër është në procesverbale, normalisht që ke me pasë probleme në këtë formë, edhe te izolimet dhe te mënyra e largimit të ujit, prandaj është mirë të bëhet edhe njëherë një detyrë projektuese ta trajtojë ujin, të bëni izolime të mira. Problemin me lumë do ta keni në vazhdimësi, sepse keni rritë shpejtësinë e ujit dhe keni dëmtuar ekosistemin, duhet të mirren materiale shtesë që të izolohet ai beton sepse nuk ka këtë formë të lumit me beton që i plotëson kriteret e ekosistemit. Ndoshta është mirë me na dhënë përgjigje për këtë sepse nuk kam pasur rastin me dhënë vërejtje për mënyrën sesi ka arritur ky projekt.

Fatmir Ademaj, Kryesues i Kuvendit: A ka dikush debat për këtë pikë të rendit të ditës? – nëse nuk ka ftojë e Drejtorin për Buxhet dhe Financa t'i japë shpjegimet për pyetjet të cilat u bënë. Urdhëro, Drejtor *Blerim Thaçi!*

Blerim Thaçi, Drejtor për Buxhet dhe Financa.

Së pari dua t'ju themi që borxh nuk kemi janë obligime kontraktuale të cilat i kemi të kontraktuara me operatorët për punët të cilat janë kryer.

Po ndalem te kontratat e punëve të Sheshit, unë e di që në janar të vitit 2022, është nënshkruar Kontratat e Sheshit në qendër dhe sipas planifikimit buxhetor ka qenë e planifikuar edhe një pjesë në vitin 2026, i cili ka vlerën 1,200,000 euro që janë si obligim mbrenda Kontratës së nënshkruar për Sheshin. Po ashtu kemi dhe obligime të tjera trevjeçare kontraktuale të cilat duhet të bartën.

Te çështja e kolektorit në Bubël dhe ajo është një kontratë, e cila është nënshkruar në vitin 2022, dhe është në implementim nuk është që ne e kemi si projekt të ri, e kemi obligim dhe besoj që këtë vit do të mbyllet dhe ajo kontratë. Të gjitha këto obligime kontraktuale janë pothuajse 90% e kontratave që do të mbyllen këtë vit. Është e vërtetë që e kemi një shumë të madhe të mjeteve të cilat janë obligim kontraktual që duhet të kryhen këtë vit. Kemi dhe te rrugët të cilat janë obligime asfaltimi i rrugëve nga kontratat paraprake. E ceku Vetoni përvojën e Sylës, por dhe Vetoni ka një përvojë politike, te renovimi i rrugëve janë 50.000 euro nuk e ceku të gjithë projeksionin, sepse nëse shikojmë janë rreth 1 milion euro.

Te kanalizimet e reja dhe këtu janë 1,400.000 € por me projeksione të vitit 2027/2028. Te renovimi i rrugëve e ceku që e kemi 0,0 është te projeksionet e vitit 2027/2028 sepse 2026 është, janë 30.000 € janë obligim nga kontrata që e kemi të nënshkruar. Lumi është një projekt i cili është i kontraktuar nga komuna për pjesën për buxhet nga performanca që e kemi pasur 620.000 € dhe si total i projektit që të realizohet ajo është dashur t'i shtohet rreth 800,000 €, që është afër 1.4 milion shtrati i lumit. Ai është si projekt i veçantë pse e kemi futur këtë projektin tjetër rrugët rreth lumit, ne nuk kemi mundur t'i fusim në projektin që është në ekzekutim, ky është projekt i ri dhe kemi paraparë që për 2-3 vjet të përfundohen dhe dy rrugët anësore të lumit. I cekët akset është e vërtetë që ndoshta është dashur një material shtesë, nuk e di a e kanë në aspektin teknologjik urbanizmi a i kanë në CD apo në USB, apo i kanë në fletë sepse ato i kanë në fotografi që i kanë bërë me dron dhe akset ku janë. Arsyetimi i firmes projektuese është rrugët për të cilat kërkohen 90% e tyre nuk kanë emra dhe i kanë bërë operatorët me akse. Carrallukë p.sh.: rruga Imer Krasniqi e kanë shënuar aksi i parë. *Imran* ndoshta nuk e lexove këtë pjesën të cilën e kemi sjellë sot aty janë të gjitha rrugët, janë në vlerë rreth 7,000,000 € këtë vit në materialin shtesë.

Renovimi i shkollave e ceku *Demiri* është një gjë që na vijnë të dhënat nga Drejtoria e Arsimit na është parapa të futen të gjitha shkollat, ne nuk mundemi t'i fusim të gjitha shkollat në sistemin e Ministris së Financave që të jenë të alokuara në buxhet, por ne kemi marrë një shembull është çështje e DKA-së kemi pasur një rast një dëmtin në shkollën e Astrazupit ndoshta e kanë parapa ndonjë sanim. Më saktë nuk e di përgjigjen janë përfshirë, por nuk do të thotë që kur bëhet kontrata duhet të bëhet ndërhyrja, por është ndërhyrja kur është nevoja, sepse nuk po janë format e kontratave në bazë të asaj çka kërkon shkolla me u kry. Dëgjimet publike i kemi mbajtur vitin e kaluar në çdo lokacion të Bashkësive lokale, në 22 Bashkësi lokale. Ftesa për qytetarë ka qenë për të gjithë, ka pasur fshatra që ka pasur mungesë por ka pasur fshatra që ka pasur pjesëmarrje të mjaftueshme.

Jemi munduar që t'i funksionojmë në buxhet të gjitha kërkesat e qytetarëve. Jemi të diskriminuar me buxhet? Jemi të diskriminuar sepse numri i popullsisë ka rënë dhe koeficienti i ndarjes së buxhetit nga qeveria nuk është ndarë, është absurde rritet buxheti bëhet 4 miliard euro në nivel qendror, e zvogëlohet në atë lokal që i bie pjesa e mbetur i mbetet qeverisë. Është dashur të ndërroj dhe koeficienti i ndarjes. Sheshi së bashku me parkun ka, nevojë me u mirëmbajtë, ka nevojë për investime për këtë arsye është planifiku më shumë në aspektin e mirëmbajtjes.

Një gjë u cek me të drejtë dhe kemi bërë dhe kërkesë mediatike që ne jemi të hendikepuar që në rastet emergjente nuk lejohet me pasë fond emergjent Komuna. Kisha kërkuar nga ju që buxheti të miratohet me ato dy ndryshimet, të cilat janë ardhur sot. Harrova të ceku dhe një gjë shumë me rëndësi se kemi projekte që janë shtyer me kërkesë për gjashtë muaj për implementim dhe kemi dalë në vitin 2026. Gjatë kësaj periudhe 4-vjeçare jemi dëmtuar në buxhet kryesisht në investime kapitale në mallra e shërbime nga Kontrata Kolektive do të jetë 3.8 milion euro, na janë marrë mjetet që na kanë penguar edhe në realizimin e këtyre kontratave. Fatmirësisht kemi pasur fatin dhe me angazhimin tonë për 4 vite rresht kemi pasur tejkalim të të hyrave që na ka mundësuar lehtësimin e realizimit të këtyre projekteve, sepse nëse nuk do të kishim tejkalim të hyrave vërtet do të kishim obligime të mëdha.

Faleminderit!

Enver Hoti, nga AAK: Unë nuk e kisha fjalën për fond emergjent, ideja është kështu të organizohet një grup i ekspertëve që do ta bëjnë vlerësimin e rreziqeve sepse ne do të vijmë prapë në të njëjtën situatë, të marrim masa që t'i përballojmë më lehtë.

Fatmir Ademaj, Kryesues i Kuvendit: Urdhëro, Kryetari i Komunës, z. *Ekrem Kastrati*!

Ekrem Kastrati, Kryetari i Komunës:

Të gjitha diskutimet, analizat, opinionet që dolën nga kjo seancë urgjente janë të kuptueshme, sepse ne të gjithë që jemi në sallë e kemi një mision të përhershëm interesin qytetarë. Besoj që të gjithë të zgjedhurit e Komunës së Malishevës po e luajn këtë rol që ta mbrojnë interesin e qytetarëve, që është obligim dhe detyrë e tyre dhe e Kryetarit të Komunës dhe njësisë komunale që t'i ketë parasysh të gjitha këto opinione, vërejtje, dëshira dhe do të mundohemi që pak a shumë t'i përmbushim këto karshi mundësive tona dhe karshi objektivave tona politike.

Mirëpo, sot është buxheti një instrument i cili i realizon të gjitha këto kërkesa tona andaj ju i dini kapacitetet tona financiare. E ceku dhe Drejtori për Buxhet dhe Financa në vend të rritet buxheti është zvogëluar, për arsye të numrit të banorëve, mirëpo ne do të shkojmë me rritjen e të hyrave tona vetanake dhe sigurisht që të trokasim në secilën derë të qeverisë qendrore dhe tek donatorë të ndryshëm që t'i përmbushim pak a shumë të gjitha këto nevoja.

Mungesa e kabinetit qeverisës e Komunës së Malishevës, sigurisht që shumë shpejt do ta kemi në Qeverinë Komunale, këtë nuk e kemi bërë, sepse na ka munguar miratimi i buxhetit. Kemi dashur që së pari ta miratojmë buxhetin pastaj ta rregullojmë, sepse një numër i asambleistëve që do të jenë, do të jetë drejtor në qeverinë e ardhëshme, prandaj dorëheqja, zëvendësimet të gjitha këto neve na marrin kohë dhe kemi dashur që së pari ta votojmë buxhetin, sepse është kërkuar prej trupave të qeverisë që komunat të cilat nuk e kanë të aprovuar buxhetin në vitin që shkoi, sa më shpejt që është e mundur me votuar në asamblatë e tyre, me qëllim që të kenë kohë ata që ta analizojnë dhe ta bashkërendojnë buxhetin e qeverisë komunale.

Kështu që të gjitha komunat të cilat nuk e kanë miratuar edhe ato do të shkojnë me procedura urgjente, sepse nuk kanë kohë me shku me mbledhje të rregullta. Bashkëpunimi me opozitën gjithmonë ka qenë, besoj që dhe do të jetë njëra prej objektivave tona të kësaj qeverie 4-vjeçare, do të kemi kohë të mjaftueshme edhe me juve qytetarë, juve parlamentarë dhe Kryesues përkatësisht dhe me anëtarë tjerë të opozitës, të gjithë e kemi një rol dhe ky rol është interesi i qytetarëve të Komunës së Malishevës. Ne nuk do të ndalemi edhe me kërkimin e donatorëve të tjerë, ju e dini që ne 1,2 milion euro i kemi marrë ndihmë vetëm prej Qeverisë së Qatarit është një shumë e madhe i kemi rritë edhe investimet në bujqësi, mirëpo kanë qenë të pamjaftueshme ndihma që e kemi marrë nga ISLAMIC RELIEF, ndihmat nga përfaqësuesit e shoqatave të tjera na kanë ndihmu që t'i realizojmë punët tona me aq buxhet që kishim. Do të vazhdojmë bashkëpunimin me të gjithë juve, do të kemi kohë me të gjitha dikasteret që të bisedojmë dhe t'i forcojmë argumentet tona faktike.

Te fatkeqësitë natyrore i gjithë populli ynë është bashkë sepse vetëm bashkë i përballojmë situatat e tilla, i dimë dhe dobësitë tona diku ku kanë dështu presim ta përmisojmë, por në fund të fundit është fuqia madhore kur ta rritë nivelin e ujit dy metra e gjysmë nuk kemi mundësi se si ta përballojmë, ato dalin mbi forcën njerëzore. Kështu që ne do të mundohemi që t'i sanojmë të gjitha defektet që i kemi pasur dhe që do të mundohemi që t'i realizojmë objektivat tona politike infrastrukture, vullnetin qytetarë dhe të gjithë.

Shtrati i lumit kërkesa jonë ka qenë që sa më shpejt të zbrazet qyteti prej ujit, ju vetë e cekët që Malisheva është një vend ku të gjithë lumenjtë e të gjitha përrockat derdhën në një luginë në shtratin e lumi Mirusha. Ne e kemi bërë detyrën projektuese që sa më shpejt me largu ujin nga qyteti, për ta larguar ujin nga qyteti duhet të rritet shpejtësia e ujit, për t'u rritur shpejtësia e ujit përveç betonit askush tjetër nuk e bën, sa i përket ekosistemit është e vërtetë që ndoshta cenohet, por ne kemi dashur që në vërshime të tilla ta largojmë ujin sa më shpejt nga qyteti. Mos të kishte qenë kjo pjesë që e largon ujin kaq shpejtë me të vërtetë do të ishin vërshimet më të mëdha dhe shumë më të rrezikshme. Diga e liqenit dihet qysh është ndërtu pa plan se nuk po dua t'i huj asaj teme, sepse i përket dikujt tjetër.

Diga është e paqëndrueshme dhe raportet tona me agjensinë për menaxhimin e emergjencave e kemi vetëm një rekomandim që atë dig duhet të riparohet të funksionalizohet, sepse përndryshe siç e ceku dhe Enveri është rrezik për banorët që jetojnë poshtë digës. Ne duhet sa më shpejt me organet tona kompetente me qeverinë qendrore, me agjensinë për menxhimin e financave dhe dikasterëve respektive që të dalim atje dhe sa më shpejt të jetë e mundur ta rehabilitojmë këtë digë që është vërtet rrezik i madh për qytetarët. Ne besojmë që shumë shpejt negociatat që i kemi pasur me përfaqësuesit e qeverisë që kjo digë të trajtohet. Edhe ujërat që shpien në fshatin Gurbardh ju e dini që është dëmtuar shumë me këto vërshime është pjesë e trajtimit të qeveris qendrore.

Të gjitha këto projekte të cilat janë dëmtuar gjatë vërshimeve ne do të kemi kujdes dhe tani veç e kemi dërguar shkresën tek ministrinë respektive që t'i sanojmë këto së bashku. Pjesa e Berishës që ka një sipërfaqe të madhe të grumbullimit të ujit edhe ajo pjesë do të trajtohet, aty është një urë me u ndërtu dhe sigurisht thellimi i përrockës nën urë. Në të ardhmen ka me qenë fotografia e fundit që do ta vendosni. I gjithë regjioni Drenas, Rahovec, Malishevë është përfshirë nga uji, ne do të bëjmë përpjekje së bashku që të gjitha këto nevoja që i kanë qytetarët e Komunës së Malishevës t'i realizojmë.

Faleminderit!

Fatmir Ademaj, Kryesues i Kuvendit: kisha kërkuar nga Enveri a dëshiron ta vendos propozimin e tij për shtyrjen e kësaj seance apo dëshiron ta largojë si propozim? Urdhëro, *Enver Hoti*!

Enver Hoti, nga AAK: Unë dua ta vendosim në votim propozimin tim që ta vendosim në votim shtyrjen e projektbuxhetit.

Fatmir Ademaj, Kryesues i Kuvendit: E hedh në votim kërkesën e *Enver Hotit* anëtarit të Kuvendit që kjo seancë të shtyhet. Kush është për?

Për: 10

Kundër: 15

Abstenim: 1

Me 10 vota **Për**, 15 **Kundër**, 1 **Abstenim** nuk kalon propozimi i Enver Hotit.

Në mbledhjen e KPF-së individualisht i kam pyet anëtarët e Kuvendit përfaqësuesit e grupeve parlamentare nga Nisma, PDK, LDK, VV se a kanë propozime konkrete që të futen në buxhet, ashtu siç ka qenë kërkesa nga Drejtori për Buxhet dhe Financave që të shtohen në buxhet sot me rekomandim të KPF-së nuk ka pasur asnjë subjekt politik asnjë propozim. Edhe sot keni hapsirën t'i sjellni në mënyrë të shënuar që t'i vendosi në votim. A ka dikush kërkesa të shënuara që të futen në buxhet komunal 2026-2028?

Urdhëro, *Veton Zogaj!*

Veton Zogaj, nga VV: Përkundrazi Kryesues jam unë që kam bërë kërkesë zyrtare te profa i kam thënë: A ka hapësirë buxhetore që na t'i japim propozimet tona si Grup Parlamentar nëse po vijmë me kërkesa zyrtare dhe i protokolojmë, nëse jo kërkesat tona unë i paraqes në seancë që dua t'i paraqes kurdo që i vjen rasti.

Fatmir Ademaj, Kryesues i Kuvendit: A ke propozim, *Veton?*

Veton Zogaj, nga VV: Po i kam, mundem me t'i lexu, sepse nuk i kam të shënuara mund t'i dërgoj dhe në e-mail.

Fatmir Ademaj, Kryesues i Kuvendit: Propozime të shënuara, duhet t'i vendosni në votim, ose e çekim kërkesa e Vetonit me propozimet e çekura më lart.

Veton Zogaj, nga VV: Ne si grup kemi 7 kërkesa të cilat janë shumë të arsyeshme si nevoja për qytetarët e Komunës së Malishevës, të cilat kanë ardhë kërkesë prej qytetarëve. Nëse ka hapësirë buxhetore me u futë si projekte do të isha shumë mirënjohës dhe falënderues.

Kërkesa e parë është:

1. Renovimi i stacionit të autobusëve në Malishevë me kosto buxhetore prej 200.000 € që nënkupton që është projekt dyvjeçarë.
2. Bursa për studentë, 200-300 studenë.
3. Zgjerimi i hyrjeve dhe daljeve të qytetit sidomos në rrugën "Adem Jashari" dhe rruga "Imer Krasniqi" të bëhen në 4 kursi. Projekte dyvjeçare.
4. Vendosja e dy semaforëve në rrugën "Ibrahim Mazreku" te hyrja e gjimnazit dhe në rrugën "Gjergj Kastrioti" te hyrja e Komunës së Malishevës.
5. Hapësira e nënparkingut t'i jepet në menaxhim të shoqatës së dalë nga lufta.
6. Ndërtimi i objektit të ri të Biblotekës së qytetit.
7. Ndërtimi i rrethrotullimit në kyqjen e rrugës në fshatin Tërpez.

Fatmir Ademaj, Kryesues i Kuvendit: A ka dikush tjetër ndonjë propozim? Urdhëro, *Enver Hoti!*

Enver Hoti, nga AAK: Unë propozoj që kanalizimi në Kijevë të realizohet, të lidhet me kolektorin kryesor që shkon në Malishevë. Në Carrallukë një kanalizim që ka mbetur në gjysmë afër 10 vjet të lidhet me kanalizime.

Fatmir Ademaj, Kryesues i Kuvendit: Urdhëro, *Drejtori për Buxhet dhe Financa!*

Blerim Thaçi: Janë të planifikuara te ndërtimet e reja të kanalizimeve edhe pjesa e kanalizimeve të Kijevës dhe të fshatit Carrallukë. Janë projeksione 3-vjeçare.

Enver Hoti, AAK: Kërkesa ime është t'i jipet prioritet.

Blerim Thaçi: Enver çështja e prioritetit është kontrata dhe mbikqyrësit vendosin kur i sheh më të domosdoshme, është çështje e implementimit.

Fatmir Ademaj, Kryesues i Kuvendit: I kemi dy propozime nga *Veton Zogaj* dhe nga *Enver Hoti*.

Kush është për që të miratohen këto propozime të *Veton Zogaj* nga LVV:

1. Renovimi i stacionit të autobusëve në Malishevë me kosto buxhetore prej 200.000 € që nënkupton që është projekt dyvjeçarë.
2. Bursa për studentë, 200-300 studenë.
3. Zgjerimi i hyrjeve dhe daljeve të qytetit sidomos në rrugën “Adem Jashari” dhe rruga “Imer Krasniqi” të bëhen në 4 kursi. Projekte dyvjeçare.
4. Vendosija e dy semaforëve në rrugën “Ibrahim Mazreku” te hyrja e gjimnazit dhe në rrugën “Gjergj Kastrioti” te hyrja e Komunës së Malishevës.
5. Hapësira e nënparkingut t'i jepet në menaxhim të shoqatës së dalë nga lufta.
6. Ndërtimi i objektit të ri të Biblotekës së qytetit.
7. Ndërtimi i rrethrotullimit në kyqjen e rrugës në fshatin Tërpez.

Për: 10

Kundër: 15

Abstenim: 1

Me 10 vota **Për**, 15 **Kundër**, 1 **Abstenim** nuk kalon propozimi i *Veton Zogaj*.

Kush është për propozimin e *Enver Hotit* që kanalizimi në Kijevë të realizohet, të lidhet me kolektorin kryesor që shkon në Malishevë.

Në Carralluk një kanalizim që ka mbetur në gjysmë afër 10 vjet të lidhet me kanalizime, të ju jepen prioritet.

Për: 10

Kundër: 15

Abstenim: 1

Me 10 vota **Për**, 15 **Kundër**, 1 **Abstenim** nuk kalon propozimi i *Enver Hotit*.

E hedhim në votim kërkesën nr. 04/534 datë: 29.08.2025 *për miratimin e projektbuxhetit për vitin 2026/2028.*

* Gjatë procesit të votimit për miratim të buxhetit sallën e lëshuan: PDK dhe LVV.

Prezent jemi 17 anëtarë dhe kemi kourum për vazhdim të votimit.

E hedh në votim kërkesën nr. 04/534 datë: 29.08.2025 *për miratimin e projektbuxhetit për vitin 2026/2028.*

Kush është për?

Për: 15


Kundër: 1

Abstenim: 1

Me 15 vota **Për**, 1 **Kundër**, 1 **Abstenim** miratohet buxheti komunal për vitin 2026-2028.

Me kaq e përfundojmë këtë seancë.

Procesmbajtësja
Argenitë Thaçi



Kryesuesi i Kuvendit
Fatmir Ademi

